



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

44. Kalenderwoche – ab 1. November 2009

Delefoniern odor nisch?

Nee, manschma bin isch sowas von froh, dass isch keene junge Muddi bin! Ährlich!
Wobei nadiehrlich bei mir ooch de Gefahr, eene junge Muddi zu sein, reladief gering is. So als Mann un im vorgeriggd Aldor... - nee, dähr Gefahr bin isch sähr wenisch ausgesedzd. Abor wensch mir das ehm so vorschdeln du... - isch so eene junge Muddi mid een odor gahr zwee kleene Kinnor im Schlebbdau... die immor was annersch wolln, als wie isch...! Nee, die dun mir manschma rischdisch leid! Grade im Subormargd - da isses ja schon bei mir, wensch alleene bin, ofd genuch so wies is - nähmlisch schweißdreibend!

Das heeßd, solange wie isch dursch de Gänge schbaziern du un mir angugge, was isch gebrauchn kennde... also, was isch gebrauchn kennde, außor dähm Zeusch, was mir meine Gudste offn Zeddl geschriehm had! Also, was fiehr dähn indeividuelln Bedarf meinorseids sein kennde - zum Beischbiel e Fläschn Nordheisor Dobblkorn odor ooch ma e Schdiggl Bflaumkuchn... Also, jednfalls, solange wie isch dursch de Gänge schbaziern du, isses ja nisch so gefährlich, abor wenn isch dann in de Nähe von dor Kasse komm... odor - wos dann gulminiern dud - wenn isch de Einkoofsbeude offs Loofband geleschd hab un nu an dor Kasse dran bin... - da bisde ja voll gefordord. Alles, was de Kassierorin rieberschiehm dud, widdor einreim in den Einkoofswachn un dann bezahln... hammse villeischd zwee Groschn? Nu suchsde emsich im Bordmonäh... un de Ährdbährn sinn grade aus dor Baggung gerollord... de Flasche Nordheisor hasde in dor Hasd offn Bflaumkuchn geschdelld... un dann dud das Hendy bimmln!

Das is werglich zum vorriggd wern - e Hendy dud immor im bleedesdn Momend bimmln! Nisch bloß an dor Kasse im Subormargd... ooch sonsd! Abor an dor Kasse isses besonders bleede. Wenn de nu nähmlisch nangehn dusd, ziehsde dir dähn heilichn Zorn von alle die off disch, die in dor

Schlange ungeduldig wardn dun, dass de endlich dei Kleengeld findn dusd un abziddorn kannsd. Du hasd jedzde also de Wahl zwischn Hassobjeggd sein odor defonieren!

Nisch defonieren is abor nu ooch sähr gefährlich. Es kennde ja meine Gudste sein, die mir noch was sachn will, was isch noch midbring soll. Zusädzlich zu dähm, was offm Zeddl schdehn dud. Was, wassor noch ganz dringend eingefalln is! Un nu in dähr Siduadsjohn an dor Kasse - alles einbaggn, Ährdbährn reddn, Kleengeld suchn, defonieren... - wensde dann noch Kinnor dabei hasd... wie ehm manschma so junge Muddis... - nee, das is dann dor blanke Horror!

Ja, denn ooch bei junge Muddis dud das Hendy ja immor erschd an dor Kasse bimmln. In dähr Beziehung sinn mir uns sähr ähnlisch - isch un junge Muddis. Bloß bei die jung Muddis is ja nisch sowas Gefährliches wie meine Gudste am Hendy dran. Die kenn sich villeischd ma leisdn, das Hendy eenfach bimmln zu lassn un nisch nangehn. Abor isch... - nee, das drausch mir nisch. Dann lieber dor Hass dor Massn!

Eduard Sachsenmeyer